

TH umum rayuan haji musim ini ditutup sepenuhnya

BERITA HARIAN 22/5/2023 M/S: 13

Sepang: Lembaga Tabung Haji (TH) mengesahkan semua 31,600 kuota jemaah yang diperuntukkan untuk musim haji kali ini sudah penuh.

Pengarah Eksekutif Haji TH, Datuk Seri Syed Saleh Syed Abdul Rahman, berkata susulan itu, rayuan haji yang dibuka sebelum ini ditutup sepenuhnya.

“Seperti sedia maklum, setiap tahun kita buka ruang kepada mana-mana pihak untuk buat rayuan haji selagi mana mereka sudah mendaftar haji.

“Untuk makluman, sekarang (malam kelmarin) dah bermula penerbangan pertama, maka sudah penuh kuota 31,600 jemaah dan tidak ada lagi rayuan yang akan kita pertimbangkan,” katanya pada Majlis Mengucapkan Selamat Jalan kepada Jemaah Haji Malaysia bagi Penerbangan Pertama, di Lapangan Terbang Antarabangsa Kuala Lumpur (KLIA), di sini, malam kelmarin.

Hadir sama, Pengarah Urusan Kumpulan dan Ketua Pegawai Eksekutif TH, Syed Hamadah Syed Othman.



Syed Saleh beramah mesra dengan kumpulan pertama jemaah haji di KLIA, kelmarin. (Foto Asyraf Hamzah/BH)

Syed Saleh yang juga Ketua Rombongan Haji Malaysia, berkata TH menerima hampir 100,000 permohonan rayuan haji bagi tahun ini.

“Seperti tahun sebelumnya, hampir 100,000 (permohonan) merayu untuk menunaikan haji di samping mereka yang sudah ada giliran untuk menunaikan

ibadat itu.

“Bila ada kekosongan, kita akan isi dengan rayuan yang kami terima,” katanya.

Beliau berkata, jika terdapat kekosongan pada saat akhir sekali pun, jumlahnya amat kecil.

Situasi itu berlaku berikutan ada jemaah yang membatalkan atau menunda pemergian mereka

pada saat akhir kerana alasan peribadi, antaranya disebabkan urusan keluarga, kesihatan dan sebagainya.

Suhu 50 darjah Celcius

Mengulas mengenai cuaca panas di Tanah Suci ketika ini, beliau berkata, TH sentiasa mengingatkan jemaah supaya memberi

perhatian kepada soal kesihatan dan keselamatan diri sepanjang menunaikan ibadat.

“Kita sudah tekankan mengenai cuaca yang amat mencabar, dijangka terus meningkat sehingga 50 darjah Celcius. Pertama, kita beri penekanan kesedaran kepada jemaah haji supaya jaga diri mereka.

“Kedua, TH sendiri akan adakan sebarang aktiviti secara berkumpulan dalam waktu malam supaya tak terlalu terdedah kepada cuaca panas.

“Selain itu, kita ada kumpulan perubatan untuk hadapi sebarang kemungkinan seperti strok haba yang mungkin berlaku, sama ada di Makkah atau Madinah, terutama ketika jemaah berada di Arafah, Muzdalifah dan Mina, di mana mereka duduk di khemah dan terdedah kepada cuaca panas,” katanya.

Malam kelmarin, kumpulan pertama jemaah haji bagi Musim Haji 1444H/2023M berangkat ke Tanah Suci dengan menaiki pesawat Malaysia Airlines, MH8056.